



## IKINYAMAKURU K'IMIHINDAGURIKIRE Y'IKIRERE N° 23, KIGENEWE


### ABAHINZI- BOROZI IGICE CYA KABIRI KANAMA (11-20), 2020

Cyasohotse ku itariki ya 22 Kanama 2020

#### Iriburiro

Mu minsi icumi y'igice cya kabiri, Kanama 2020 kuva tariki ya 11 kugeza tariki ya 20, ahenshi mu gihugu habonetse imvura nke ugereranyije n'isanzwe igwa muri ayo matariki mu gihe cy'imyaka myinshi, uretse ku bupimiro bwa Busogo na Ngoma haguye imvura iruta iyari isanzwe ihagwa.

Ibipimo by'ubushyuhe ni nk'ibisanzwe mu gice cya kabiri cya Kanama, igipimo cy'ubushyuhe bwo hejuru cyari hagati ya dogere Selisiyusi (°C) 20.8 muri Musanze na 33.3°C muri Rusizi ku bupimiro bwa Bugarama naho igipimo cy'ubushyuhe bwo hasi cyari hagati ya 11.3°C muri Musanze ku bupimiro bwa Busogo na 19.4°C ku bupimiro bwo mu mujyi wa Kigali.




**Ishusho 1:** Imvura yaguye ugereranyije n'isanzwe igwa muri iyo minsi.

## 1.0. Imvura yaguye

Aha turerekana ingano y'imvura yaguye, umubare w'iminsi imvura yaguye n'ubuhere bw'ubutaka mu minsi icumi y'igice cya kabiri cya Kanama 2020.

### 1.1. Ingano y'imvura yaguye

Ikarita ya mbere hasi irekanya ingano y'imvura yaguye mu minsi icumi y'igice cya kabiri cya Kanama 2020. Muri iki gice cya kabiri imvura yapimwe yari nke mu bice byinshi by'igihugu. Imvura ingana na milimetero 24.4 yapimwe ku bupimiro bwa Busogo ikaba ari nayo yari nyinshi, naho iyabaye nke yari minsi ya milimetero 5, ikaba yarabonetse mubice byinshi by'igihugu cyane cyane mu Mujyi wa Kigali, Amajyepfo, Uburengerazuba n'Uburasirazuba.




*Ikarita ya 1: Ingano y'Imvura yaguye mugice cya kabiri cya Kanama 2020 muri mm*

### 1.2 Impuzandengo y'imvura isanzwe igwa mu minsi icumi y'igice cya kabiri cya Kanama

Ufatiye ku bipimo by'igihe kirekire, ikarita ya kabiri iratwerekana imvura isanzwe igwa mu minsi icumi y'igice cya kabiri cya Kanama. Ubusanzwe igice cya mbere cya Kanama kigusha imvura iri hagati ya milimetero 3.2 na 26.6;

bigaragara ko ugereranyije n'imvura yaguye n'isanzwe igwa mu gihe kirekire, imvura yabaye nke cyane mu gihugu hose uretse ku bupimiro bwa Busogo na Ngoma aho yaguye ari nyinshi ugereranyije n'ahandi mu gihugu.



*Ikarita ya 2: Imvura isanzwe igwa mu gice cya kabiri cy'ukwezi kwa Kanama*

### 1.3. Umubare w'iminsi imvura yaguyemo

Ikarita ya 3 iragaragaza umubare w'iminsi imvura yaguyemo, mu gice cya kabiri mu kwezi kwa Kanama 2020. Umunsi tubara ko wagushije imvura ni uwapimweho byibuze milimetero 0.85 cyangwa nyinshi. Muri iki gice iminsi itatu yabonetse ku bupimiro bwa Musanze na Nyagatare naho iminsi ibiri iboneka ku bupimiro bwa Gicumbi, Busogo and Rubavu. Ahandi hasigaye habonetse umunsi umwe ndetse ahandi ntihagira imvura ihagwa.



**Ikarita ya 3: Umubare w'iminsi imvura yaguyemo**

### 1.4 Ubuhehere bw'Ubutaka

Aha turagaragaza muri rusange uko ubuhehere bw'ubutaka bwari bumeze. Ahenshi mu gihugu ubuhehere bw'ubutaka muri iyi minsi icumi y'igice cya kabiri cya Kanama 2020 bwiyoungereyeho gake bitewe n'ubwiyongere bw'ibicu mu kirere. Hateganyijwe ko ubuhehere bw'ubutaka buzakomeza kwiyongeraho mu gice cya gatatu cya Kanama bitewe n'uko ibi bihe by'izuba bizatangira kugabanuka.


### 2.0. Iyipimo by'ubushyuhe

Aha turareba muri rusange uko ibipimo by'ubushyuhe bwo hejuru no hasi hirya no hino mu gihugu byari bimeze.

### 2.1 Iyipimo cy'ubushyuhe bwo hejuru

Ikarita ya 4 irerekana ubushyuhe bwo hejuru. Ugendeye ku bipimo by'ubushyuhe dusanzwe dupima, ahenshi mu gihugu ubushyuhe bwari mu kigereranyo cy'impuzandengo y'igihe kirekire; mu Ntara y'Iburasirazuba, mu Mujyi wa Kigali, ndetse n'igice kinini cy'Iburengerazuba cyane cyane mu Majyepfo yaho niho hashyushye kurusha ahandi.


Mu Ntara y'Amajyaruguru n'iy'Amajyepfo akaba ariho hakonje ugereranyije n'ahandi mu gihugu. Ibipimo by'ubushyuhe byari hagati ya dogere Selisiyusi 20.8 na 29.8 ahenshi mu gihugu; uretse ku bupimiro bwa Bugarama hashyushye cyane hapimwe dogere selisiyusi 33.3.



**Ikarita ya 4: Ubushyuhe bwo hejuru**

### 2.2. Iyipimo cy'ubushyuhe bwo hasi

Ikarita ya gatanu irerekana uko ubushyuhe bwo hasi bwanganaga. Ubushyuhe bwo hasi bwari hagati ya Dogere Selisiyusi 11.3°C (Busogo) na Dogere Selisiyusi 19.4°C (Umuji wa Kigali). Mu Majyaruguru y' u Rwanda niho hakonje cyane kurusha utundi duce tw'igihugu.




**Ikarita ya 5: Ubushyuhe bwo hasi**

### 3.0 Iteganyagihe rigenewe abahinzi mu minsi icumi y'igice cya gatatu cya Kanama (tariki 21-31) 2020

#### 3.1 Ikirere giteganyijwe

Mu gice cya gatatu cy'ukwezi kwa Kanama 2020 (hagati y'italiki ya 21 n'ya 31) mu Rwanda hateganyijwe kugwa imvura iri hagati ya milimetero 0 na milimetero 15. Imvura iri hagati ya milimetero 10 na 15 iteganyijwe mu karere ka Musanze, agace gato k'Akarere ka Burera gahana imbibi na Musanze, mu karere ka Nyabihu mu bice bihana imbibi n'Uturere twa Musanze, Gakenke na Ngororero, igice kinini cy'Akarere ka Ngororero gihana imbibi na Musanze, Amajyaruguru y'Akarere ka Muhanga ahagereye akarere ka Nyabihu na Ngororero, agace gato k'Akarere ka Gakenke kegereye Akarere ka Nyabihu ndetse n'agace k'Akarere ka Nyamagabe kegereye Nyamasheke.

Imvura iri hagati ya milimetero 1 na 5, iteganyijwe mu majyaruguru y'Intara y'Iburasirazuba mu turere twa Nyagatare na Gatsibo, mu bice byinshi by'Intara y'Amajyepfo, mu majyepfo, mu ntara y'Amajyaruguru mu Karere ka Gicumbi na Rulindo ahahana imbibi no mu karere ka Gatsibo na Gasabo ndetse no mu karere ka Gasabo ahahana imbibi na Rulindo no mu ka Nyarugenge naho ahagereye Kamonyi. Naho imvura iri hagati ya milimetero 0 na 1 ikaba iteganyijwe mu turere dusigaye tw'Intara y'Iburasirazuba n'utw'Umujyi wa Kigali. Imvura iteganyijwe mu gice cya gatatu cya Kanama 2020 iri ku kigero cy'impuzandengo y'imvura isanzwe igwa muri icyo gihe mu gihugu hose.



**Ikarita ya 6: Iteganyagihe ry'imvura mu gice cya gatatu cya Kanama 2020.**

#### 3.2 Ibirebana n'imirimu y'ubuhinzi

Dushingiye ko turimo gusatira igihembwe cy'ihinga A, gitangira muri Nzeri kugeza mu Ukuboza, abahinzi barashishikarizwa gukomeza kugisha inama abashinzwe ubuhinzi babegereye mu gutegura neza imirimu ijyanye n'ubuhinzi. Barashishikarizwa kandi kujya basura urubuga rwa Meteo Rwanda [www.meteorwanda.gov.rw](http://www.meteorwanda.gov.rw), cg guhamagara umurongo utishyurwa 6080.